

Sustegn per la fundaziun Pro Aua Minerala

Radunanza dals vaschins da Scuol

DAD ANNATINA FILLI / ANR

■ **Il rendaquint 2015 dal cumün da vaschins da Scuol es gnü fat bun cun gronda majorità. La suprastanza es gnüda incumbenzada da far novas propostas pel müdamaint dal artichel trais da la ledscha da vaschins.** Mardi passà s'ha radunada üna quarantina da vaschins dal cumün da Scuol illa Chasa Misoch a Sent per approvar las differentas tractandas. L'on passà vaiva la radunanza acceptà ils novs statüts cun la resalva da cumpletter l'artichel trais. Il giavüsch d'eira da pretender la premissa da cugnuschentschas da la lingua rumantscha per survgnir il vaschinadi da Scuol. Per infuormar davart quist punct vaiva la suprastanza invidà a *Jon Peider Arquint*, manader da la partiziun da dret da vaschins e dret civil pro l'Uffizi da migraziun e dret civil chantunal.

Üna lingua chantunala

«Daspö 10 ons sun las premissas uschea chi nu's po excluder persunas chi nun han cugnuschentschas da nossa lingua rumantscha», ha dit Arquint. Illa ledscha chantunala sun definidas las cundiziuns per la procedura ed ils cuosts da las deci-



Jon Peider Arquint da l'Uffizi da migraziun e dret civil chantunal ha infuormà davart las pussibilitats d'integrar la pretaisa da savair rumantsch illa ledscha da vaschins. FOTO A. FILLI

siuns dals cumüns da vaschins. La ledscha superiura lascha liber als cumüns davo quant ons da domicil ch'inchün po dvantar vaschin d'ün cumün. Tala prescriba però cha'ls novs vaschins stopchan avair cugnuschenta almain d'üna lingua uffiziala chantunala. «Quistas cumpetenzas cha' chantun surlascha als cumüns sun unicas in tuot la Svizra», ha' manzunà. Plünavant ha' infuormà a regard la revisiun da la ledscha da vaschinadi federala, la quala aintra in vigur al cumanzamaint da l'on 2018. Quista revisiun prevezza da müdar ils ons da domicil prescrits sün duos fin maximalmaing tschinch ons. «Per la naturalisaziun da persunas estras e per resguardar il giavüsch da la lingua rumantscha daja la pussibilità da variar culs ons da domicil», ha' rendü attent e: «Be cha qua poja lura dar difficultats pro famiglias chi han uffants chi discuorran rumantsch.» Tenor el füss quista soluziun pussibla be a cuorta vista e quai pervi da la revisiun da la ledscha sül chomp federal. La suprastanza dal cumün da vaschin es gnüda incumbenzada da la radunanza da ponderar novas soluziuns per l'adattamaint da l'artichel trais da la ledscha da vaschins.

Sustegn per la Fundaziun Pro Aua Minerala

Il president dal cumün da vaschins, *Jon Fadri Tönnet*, ha pudü preschantar il rendaquint cun ün guadogn da 6700 francs e quai pro entradas da 48 500 francs e sortidas da 31 800 francs. Il cumün da vaschins dombra pel mumaint 1508 vaschins, da quels han 1279 il dret da vuschar. La Chasa Punt, plü bod la chasa dals povers da Scuol, es data a fit e stess gnir renovada. Il suveran ha approvà ün credit da 25 000 francs per renovar la porta da la cuort sot, per isolar ün plafuond, per isolar las fanestras da la stüva, per far ün pitschen müdamaint illa chadafö e per lavuors da mantegniment i' l'iert. Da la Fundaziun Pro Aua Minerala ha il cumün survgnì la dumonda per ün sustegn finanziel per il preproget «Aua forta». Ün böt da la nouva suprastanza da quista fundaziun es tanter oter da coordinar tuot las activitats in connex cun l'aua forta da Scuol. «L'organisaziun da la cuntschainta eivna da l'aua suottasta nouv a la Fundaziun Pro Aua Minerala. Nus vulain stabilir l'Engiadina Bassa sco lö da l'aua», ha infuormà *Gerhard Hauser*, president da tala fundaziun. Ils preschaints han aderi per quist preproget ün sustegn finanziel da 20 000 francs.

Concentraziun, precisiun e cundiziun

Orlando Bass al campionadi european ed al mundial

DAD ANNATINA FILLI / ANR

■ **Orlando Bass giouva daspö quatter ons a tschoccas ed es fascinà da quist sport. Sco commember da la squadra naziunala da juniors as partecipescha l'prosm'eivna a las maestranzas europeanas ed eir mundias in Italia.** Üna trentina da persunas s'han chattadas fingià a bunura bod a Sur En per giovar ün turnier da tschoccas. Giuven e vegl meran, tiran e discutan las differentas tactictas. Tanter dad els es eir il giuven *Orlando Bass* da Strada. Daspö quatter ons giouvà a tschoccas ed es commember da la squadra naziunala da giuvenils fin 15 ons. La fin da schner ha' guadagnà il titel da champion svizzer pro la giuventüna suot 16 ons e pro quels suot 19 ha' raggiunt la terza piazza. Eir a Sur En es el gnü terz cun sia squadra.

Ingüna medaglia pel champion svizzer

Grazcha al trenamaint mental cun *Cla Mosca* ha impris Bass a restar calm, a na s'agitar sch'ün tun nu grataja sco giavüschà e d'avair fiduzcha in sai s'vess. «Grit suna gnü cur cha'ls organisatuors da las maestranzas svizas han comunicà d'ürant il turnier cha in nossa categoria nu gnia giovà ingün final», disch Bass. Quel mumaint manava el sia categoria cun set puncts. «Da quista situaziun sun eu stat fich dischillu e tuot es stat per mai massa emoziunal.» Sco terz da la categoria da giuvenils suot 19 ons ha' listess raggiunt il final cun quels plü vegls. «Eu nu sun però plü stat bun da manar las prestaziuns sco pro la qualificaziun», quinta'l. Per finir ha raggiunt Bass la terza piazza illa categoria suot 19 ons ed es tuornà a chasa cun üna medaglia da bruonz. «Per il titel da champion svizzer illa categoria suot 16 ons n'haja survgnì ingüna medaglia.»

«Ils turniers d'ürant fin a set uras»

Daspö ün on es Bass commember da la squadra naziunala da giuvenils da trar tschoccas. Ils trenamaints han lö illa Surselva bernaia e: «Ils trenamaints d'ürant ün di. Qua cha' viadi fin là es fich lung nu suna amo mai stat a quists

inscuters cun la squadra», manzunà'l. Unic al trenamaint d'üna fin d'eivna a Solothurn s'ha el partecipà. Ad el disturbava eir cha' sport da tschoccas nu vain tut uschè serius. «Quist gö pretendia blera concentrasiun, precisiun e cundiziun», disch il giuven sportist da Strada. Ils turniers da tschoccas cumainzan pel solit la bunura a las set e d'ürant tanter ses e set uras. «Scha'ls gös van uschè lösch possa dovrar bain ils cussagls da Cla Mosca. El m'ha muosà co ch'eu poss far mentalmaing la posa tanter ils singuls tuns da tschoccas.» Bass exercitescha duos jadas l'eivna intensivamaing a trar la tschocca: D'inviern fa' l'quai sülla piazza da glatsch a Sur En e d'instà a Ramosch sün üna piazza asfaltada. «I da differentas plattas per las tschoccas ed eir plattas per giovar la stà», declera'l. Tenor el sun la

practica, l'esperienza e la concentrasiun ils trais factors importants per avair success cun quist sport.

Prüma jada da la partida al campionadi mundial

Prosm'eivna sun tant las maestranzas europeanas sco eir las mundias da creschüts e giuvenils a Ritten, in vicinanza da Bulsan. Pro tuotats duos maestranzas sun ils giovaders da la Germania e da l'Austria ils favorits. «Ils giuvenils da l'Austria han tuot otras pussibilitats da trenamaint co nus qua in Svizra. Quels han eir scoulas medias cun classas da sport per giovaders da tschoccas», constata Bass. Sco commember da la squadra naziunala da giuvenils suot 16 e 19 ons es eir el da la partida a quista concorrenza. «Eu n'ha avant las maestranzas amo ün ter-

min pro Cla Mosca. Qua vulain nus definir meis böts ch'eu vögl raggiundscher e co ch'eu poss lura am focussar be sün quai», manzunà'l. Ün da seis böts pro sia prüma partecipaziun a Maestranzas europeanas es da rivar i' l'final dals giuvenils dal trar singul. Ils meglers 14 da la qualificaziun rivan in quist final. «Pro runda vögl eu raggiundscher ün nouv record personal. Il maximum pro runda es 240 puncts, be, quai nu raggiundscha ingün.» Plünavant fa el quint cha pro la concorrenza da las squadras pudessan els guadagnà üna medaglia. «Qua giouvan lura adüna be üna squadra pro pajais», declera'l. Bass as partecipescha eir a la concorrenza da trar il plü dalöntscher pussibel la tschocca. Il record mundial pro quista disciplina importa 566 meters ed exista fingia daspö passa 30 ons.

Sport, musica e giarsunadi

Il giovar a tschoccas nun es l'unic hobi dal giuven da Strada. El es commember da la Musica giuvenila da Valso, da la Musica da Ramosch e piglia part cul proget «Engadin Concert Band» a la Festa da musica federala a Montreux. «Cun la musica giuvenila ans vaina partecipats a l'ultima Festa da musica chantunala per giuvenils. Ad üna festa da musica federala piglia part per la prüma vouta», constata'l. Bass finischa quist on il temp da scuola obligatoric e cumainza lura il giarsunadi da specialist per il mantegniment da vias. «Meis genituors nu d'eiran il prim uschè daperüna cun meis giavüsch da manster. Ma davo ch'els s'han infuormats a regard quist manster varià d'eiran els perinclets cun mia tscherna», disch Bass. El manzuna cha sco stradin survain el üna invista in blers differentes mansters: Mürader, falegnam, constructor da vias o eir il manster dal giardinier e boscher.

Da l'üsanza al sport da prestaziun

Tschoccas es ün sport chi vegn praticà i'ls pajais da las Alps e sumaglia ün pa al cuntschaint curling. Il gö da tschoccas es ün vegl sport popular ed istoricamaing ün'üsanza. Plü bod gniava giovà a tschoccas d'inviern ed in regions cun lais dschets. La fuorma moderna po esser üna disciplina sportiva da prestaziun chi vegn giovà tenor reglas e per gronda part s'han ils giovaders as miss insembel a societats. Hozindi vegn quist sport praticà d'ürant tuot l'on e vegn giovà illas disciplinas da gruppas, pel solit quatter persunas, il trar sün distanza ed il trar sün ogets. Il gö da tschoccas es ün sport da precisiun. Las prümas maestranzas europeanas han gnü lö da l'on 1951 a Garmisch-Partenkirchen ed a Frankfurt am Main han ils sportists cumbattü per il prim campionadi mundial.



Orlando Bass exercitescha d'inviern sülla piazza da glatsch a Sur En a trar la tschocca. FOTOS A. FILLI



Per trar la tschocca douvra Orlando Bass concentrasiun, precisiun e cundiziun.